



ODLUKA
o stipendiranju učenika srednjih škola iz Budžeta Grada Sarajeva
(prijedlog)

Predlagač: Gradonačelnik Grada Sarajeva
Obrađivač: Gradska služba za obrazovanje, kulturu,
sport i mlade

Sarajevo, decembar 2018. g.



Na osnovu člana 26. stav 1. tačka 2. Statuta Grada Sarajeva ("Službene novine Kantona Sarajevo", broj 34/08 - prečišćeni tekst), Gradsko vijeće Grada Sarajeva, na sjednici od __.__.2018. g., donosi:

(prijedlog)

ODLUKU o stipendiranju učenika srednjih škola iz Budžeta Grada Sarajeva

I OPĆE ODREDBE

Član 1.

Ovom Odlukom utvrđuju se opće odredbe, način, kriteriji i postupak stipendiranja učenika srednjih škola iz Budžeta Grada Sarajeva.

Stipendije Grada Sarajeva dodjeljuju se iz Budžeta Grada Sarajeva, za tekuću školsku godinu 9 (devet mjeseci), a ukupan broj stipendija određuje se u skladu sa raspoloživim sredstvima Budžeta Grada Sarajeva, planiranim za ovu namjenu.

Visina mjesečne stipendije iznosi 100,00 KM po učeniku što za 9 (devet mjeseci) iznosi ukupno 900,00 KM.

II NAČIN I KRITERIJI

Član 2.

Gradonačelnik Grada Sarajeva jednom godišnje raspisuje Konkurs za stipendiranje učenika srednjih škola iz Budžeta Grada Sarajeva (u daljem tekstu: „Konkurs“).

Konkurs se objavljuje na službenoj web - stranici Grada Sarajeva i sadrži uslove i kriterije koje kandidati moraju ispunjavati, rok i način za podnošenje prijave, iznos stipendije, te druge potrebne podatke.

Gradonačelnik Grada Sarajeva će putem Gradske službe za obrazovanje, kulturu, sport i mlade (u daljem tekstu: „Služba“) po objavljivanju Konkursa na službenoj web - stranici Grada Sarajeva, objaviti i Informaciju o raspisivanju Konkursa, u dva štampana medija javnog informisanja.

Član 3.

Pravo učešća na Konkursu iz člana 2. ove Odluke imaju učenici srednjih škola sa područja četiri gradske općine (Općina Centar Sarajevo, Općina Stari Grad Sarajevo, Općina Novo Sarajevo i Općina Novi Grad Sarajevo), koji se nalaze na redovnom školovanju, koji ne obnavljaju razred i koji nisu korisnici stipendija iz drugih izvora.

Član 4.

Kriteriji za stipendiranje učenika srednjih škola iz Budžeta Grada Sarajeva su:

1. nizak porodični standard i otežani uslovi života

- učenik bez oba roditelja (15 bodova);
- učenik bez jednog roditelja/samohrani roditelj/staratelj (10 bodova);
- učenik čija su oba roditelja nezaposlena (8 bodova);
- učenik čiji je jedan roditelj nezaposlen (5 bodova);
- višečlane porodice, prednost imaju porodice sa troje i više djece (5 bodova za troje djece, svako sljedeće dijete 1 bod);

2. učenici srednjih strukovnih/zanatskih škola (8 bodova);

3. učenici sa najmanjom prosječnom ocjenom 4,0 (2 boda).

Član 5.

U slučaju da prijavljeni učenici imaju jednak broj ukupno ostvarenih bodova, prednost će imati onaj učenik koji ima više bodova po osnovu niskog porodičnog standarda i otežanih uslova života.

Član 6.

Učenici koji se prijavljuju na Konkurs dužni su priložiti sljedeću dokumentaciju:

- Prijava mjesta prebivališta, odnosno boravišta (za sve učenike);
- Izvod iz matične knjige umrlih (za učenike bez jednog ili oba roditelja);
- Odgovarajući dokument nadležnog organa kojim se dokazuje status samohranog roditelja/staratelja (za učenike koji žive sa jednim roditeljem/starateljem);
- Potvrda iz Službe za zapošljavanje (za učenike čiji je jedan ili oba roditelja nezaposlen);
- Kućna lista (za višečlane porodice sa troje i više djece);
- Svjedočanstvo ili đачka knjižica kojima se dokazuje da je učenik prethodni razred završio sa najmanjom prosječnom ocjenom 4,0, a za učenike prvih razreda svjedočanstvo ili đачka knjižica o završenom devetom razredu sa najmanjom prosječnom ocjenom 4,0;
- Potvrda o upisu u tekuću školsku godinu;
- Izjava učenika, odnosno roditelja/staratelja ukoliko je učenik maloljetan da je saglasan da se njegovi lični podaci, odnosno podaci djeteta, mogu obrađivati u skladu sa članom 5. Zakona o zaštiti ličnih podataka, a za potrebe provođenja konkursne procedure;
- Izjava učenika, odnosno roditelja/staratelja ukoliko je učenik maloljetan da ne prima stipendiju po nekom drugom osnovu;
- Broj bankovnog računa učenika, odnosno roditelja/staratelja ukoliko je učenik maloljetan, na koji će se vršiti uplata stipendije.

Član 7.

Sva potrebna dokumentacija kojom se dokazuje ispunjenje kriterija za stipendiranje učenika srednjih škola mora biti original ili ovjerena kopija.

Neblagovremene i nepotpune prijave neće biti uzete u razmatranje.

Član 8.

Prijave na Konkurs podnose se, u roku od 15 dana, od dana objavljivanja na službenoj web - stranici Grada Sarajeva, lično na protokol ili putem pošte na adresu Gradska uprava Grada Sarajeva, Gradska služba za obrazovanje, kulturu, sport i mlade, Hamdije Kreševljakovića broj 3, sa naznakom, „Konkurs za stipendiranje učenika srednjih škola“.

Obrasci (Prijava i Izjave) se preuzimaju na službenoj web-stranici Grada Sarajeva, www.sarajevo.ba ili lično u Službi, 3. sprat, Hamdije Kreševljakovića 3.

III POSTUPAK STIPENDIRANJA

Član 9.

Sve prijave pristigle na Konkurs Služba sa kompletnom dokumentacijom upućuje na sjednicu zajedničke Komisije za razmatranje, obradu i analizu pristiglih prijava na Konkurs za stipendiranje učenika srednjih škola iz Budžeta Grada Sarajeva (u daljem tekstu: „Komisija“).

Komisiju iz stava 1. ovog člana čine 4 predstavnika Gradskog vijeća Grada Sarajeva i 3 predstavnika Gradske uprave Grada Sarajeva.

Gradsko vijeće Grada Sarajeva svake godine donosi novu Odluku o izboru članova Komisije za razmatranje, obradu i analizu pristiglih prijava na Konkurs za stipendiranje učenika srednjih škola iz Budžeta Grada Sarajeva, predstavnika Gradskog vijeća, za tekuću školsku godinu.

Nakon donošenja Odluke iz stava 3. ovog člana Gradonačelnik Grada Sarajeva donosi Rješenje o imenovanju zajedničke Komisije za razmatranje, obradu i analizu pristiglih prijava na Konkurs za dodjelu stipendija iz sredstava Budžeta Grada Sarajeva za tekuću godinu.

Član 10.

Zadatak zajedničke Komisije iz člana 9. ove Odluke je da prijave pristigle na Konkurs obradi i analizira u skladu sa kriterijima utvrđenim ovom Odlukom, odnosno uslovima navedenim u Konkursu.

Nakon obrade i analize svih pristiglih prijava, Komisija sačinjava konačnu listu stipendista, te istu dostavlja gradonačelniku Grada Sarajeva na saglasnost.

Lista izabranih stipendista biće objavljena na službenoj web-stranici Grada Sarajeva, www.sarajevo.ba.

Na listu iz prethodnog stava ovog člana učenici mogu podnijeti pismeni prigovor u roku od 8 (osam) dana od dana objavljivanja iste.

Po zaprimljenom pismenom prigovoru gradonačelnik Grada Sarajeva će u roku od 8 (osam) dana obavijestiti kandidata odnosno donijeti odgovor na prigovor.

Gradonačelnik Grada Sarajeva će sa izabranim učenicima, stipendistima, odnosno njihovim roditeljima/starateljima, potpisati pojedinačne Ugovore o stipendiranju, kojima će se regulisati međusobna prava i obaveze.

IV PRELAZNE I ZAVRŠNE ODREDBE

Član 11.

Gradonačelnik Grada Sarajeva ima pravo da obustavi isplatu stipendija učeniku ukoliko:

- napusti redovno školovanje;
- izgubi pravo na dalje školovanje;
- prima stipendiju po nekom drugom osnovu.

Član 12.

Nadzor nad provedbom ove Odluke vrši gradonačelnik Grada Sarajeva, putem Službe.

Gradonačelnik Grada Sarajeva se obavezuje da putem Službe jednom godišnje dostavi Gradskom vijeću Grada Sarajeva Izvještaj o provođenju ove Odluke.

Član 13.

Sredstva za stipendiranje utvrđuju se u Budžetu Grada Sarajeva svake godine, za narednu godinu.

Član 14.

Gradonačelnik Grada Sarajeva može putem Službe da kontaktira relevantne ustanove, u slučaju potrebe eventualnih provjera dokumentacije, za učenike prijavljene na Konkurs.

Član 15.

Izmjene i dopune Odluke, vrše se na način i po postupku za njeno donošenje.

Član 16.

Stupanjem na snagu ove Odluke prestaju da se primjenjuju Program stipendiranja učenika srednjih škola za 2016. godinu (bez posredovanja Fondacije „Ikre“) od 29.06.2016. godine i Pravilnik o dodjeli stipendija Grada Sarajeva broj: 01-05-3257/16 od 30.06.2016. godine.

Član 17.

Ova Odluka stupa na snagu narednog dana od dana objavljivanja u „Službenim novinama Kantona Sarajevo“.

**PREDSJEDAVALAČI GRADSKOG VIJEĆA
GRADA SARAJEVA**

**Broj:
Sarajevo,**

Igor dr. Gavrić

OBRAZLOŽENJE

PRAVNI OSNOV

Pravni osnov za donošenje Odluke sadržan je u članu 26. stav 1. tačka 2. Statuta Grada Sarajeva kojim je propisano da Gradsko vijeće Grada Sarajeva donosi odluke, druge propise i opće akte i daje njihovo tumačenje.

RAZLOZI DONOŠENJA

Grad Sarajevo je prije dvije godine pokrenuo projekat direktnog stipendiranja učenika srednjih škola sa područja četiri gradske općine, putem raspisivanja konkursa, nakon dugogodišnje, vrlo uspješne saradnje sa Fondom Kantona Sarajevo za stipendiranje i školovanje djece boraca, poginulih boraca i poginulih civila - žrtava rata „IKRE“. Na taj način omogućena je dostupnost stipendija još većem broju učenika. S tim u vezi Gradsko vijeće Grada donijelo je Program stipendiranja učenika srednjih škola za 2016. godinu (bez posredovanja Fonda „IKRE“), koji je poslužio kao prelazno rješenje, odnosno osnov da gradonačelnik Grada Sarajeva donese Pravilnik o dodjeli stipendija kojim su se definisale opće odredbe, način, kriteriji i postupak za dodjelu stipendija Grada Sarajeva. Dakle, na osnovu pomenutog Pravilnika Grad Sarajevo je u kontinuitetu od školske 2015/2016 godine dodjeljivao stipendije učenicima srednjih škola, iz Budžeta Grada Sarajeva. Shodno naprijed navedenom, cijeneći izuzetan značaj ovog projekta, kao i potrebu da se donese jedan jedinstven propis kojim se reguliše ova oblast, Gradsko vijeće Grada Sarajeva je donijelo Odluku.

OBRAZLOŽENJE PREDLOŽENIH RJEŠENJA

Članom 1. Odluke utvrđuju se opće odredbe, način, kriteriji i postupak stipendiranja učenika iz Budžeta Grada Sarajeva za tekuću školsku godinu, te visina mjesečne stipendije.

Članom 2. propisuje se obaveza i način raspisivanja konkursa.

Članom 3. i članom 4. propisuje se ko ima pravo učešća na konkursu, kao i kriteriji za stipendiranje učenika.

Članom 5. propisuje se koji učenik ima prednost u slučaju jednakog broja ostvarenih bodova.

Članom 6. propisuje se dokumentacija koju su učenici dužni priložiti prilikom prijavljivanja na konkurs.

Članom 7. propisuje se da sva potrebna dokumentacija treba biti original ili ovjerena kopija, a

članom 8. propisuje se način podnošenja prijave.

Članom 9. i članom 10. propisuje se postupak rada Službe, odnosno zajedničke Komisije za razmatranje, obradu i analizu pristiglih prijava na Konkurs.

Članom 11. propisuje se pravo gradonačelnika da obustavi isplatu stipendija u odgovarajućim situacijama.

Članom 12. propisuje se ko vrši nadzor nad provođenjem Odluke, kao i obaveza podnošenja Izvještaja o provođenju Odluke Gradskom vijeću Grada Sarajeva.

Članom 13. i članom 14. propisuje se kako se utvrđuju sredstva za ovu namjenu u Budžetu Grada Sarajeva, kao i pravo gradonačelnika Grada Sarajeva da u slučaju potrebe kontaktira relevantne ustanove.

Članom 15., članom 16. i članom 17. propisuje način izmjena i dopuna Odluke, prestanak važenja ranijih propisa, te stupanje na snagu Odluke.

FINANSIJSKA SREDSTVA

Finansijska sredstva za realizaciju ove Odluke biće obezbijedena u Budžetu Grada Sarajeva.